


Mateus 26




Iok, ngaunga matana nenga Ingototo nem, ana etue iri rahtele elle (6) tu kura pe Iesus lange Petani nga kileng nenge Lasarus tu ia. Pe Lasarus i non nenge Iesus hemaul heke mule i nga metenga. Ol pe Maria mene ure nenge inangana halang nge uruna haka toto pe la ke pasiling heke nga Iesus apena pe taunune nga palpalna ina. Pe pele neu letena muta ia ure neu inangana.



Iok laol, Iesus nena hana iri analoch pe nai, pe elle ene Iutas Iskariot. Iutas tuahita Iesus ana nge tunginga ana hana mur aria papalauna mur ke teke tung heke Iesus lange iri. Hana nemur te longe pe te iech pe te hele lange i ke lape teol hite i. Iutas tango rara sapele kue nenge lape mene Iesus pe tung heke lange iri.



Ke Iesus na hana mur tela pe te poi mana ke pomanga hele ngana pe te tatalo ele sapele ure mur nga lamau. Iok, te ngaungau ol pe Iesus mene beret nem pe hele urana toto lange NeHalang pe reke pe tungge lange nena hana mur pe hele, "A mene ke a ngaua. Mirak koi nei."



3

Ke het pe mene heke uain nga eulinga pe hele urana toto lange NeHalang. Pe tungge lange nena hana mur pe hele, "Imo lochloch a mene nei ke a inia. Eik koi, nenge lape pasiling hot ke hekerkereng ia Tomunga hel ana Helenga nem. Iange eik i sipona lomo sue hulua lochloch reria poinga poreke ngana mur."



4

Pe Iesus hele lange Simon nenge ene e pule Petrus, "Simon o longo at, Non Poreke ngana lemene toto ke totoi ia imo. Pe i teke poia imo ke pomanga non nenge rur hotote uit nganangana nga paena. Pe iau e hetaulau amo lange NeHalang ke letemo manmanna ngana nem lape tu ke kerkereng. Pe nga etue nenge ohul mule letem, ola ke o hekerkereng mule pekngam mur leteria."



5

Pe Petrus hele, "Non Soke, iau etu ke e angala mana nga utar nenge lape lohot. Nenge teke te mene iong langa tuele au ngana lape te mene iau la pule. Pe nenge teke te hune iong lape te hune iau pule." Pe Iesus hele lange Petrus, "E hele pengpeng lange iong, lape pareo tang ero kura pe o pallaka ke hemol ke o teke o eteia iau ero."




6

Iok laol, Iesus la luluch nge nena hana mur ke tela nga kileng nenge te hetue ke ene Ketsemani. Ol pe hele lange nena hana mur ke pomai, "A are lakoloi pe ela lamau ke e hetaulau mukam." Iesus hele, "Temek, iong nakum nge o poia ure lochloch ngana. O poi ele melmelenga palaungana nei nge iau. Pe o poia nga lemek ngak ero, opoi mene nga iong sipom lemengam."



7


Pomalama non sauhot nga ume neu. Pe tungginga ana hana mur aria papalauna mur pe Paresio mur te kulosia palpal hussu mur hel ke tela luluch nge Iutas. Pe pule, palinga hel ana hana mur nenge Rom te koke iri pe te lochloch ia reria lemenga mur pe rir pe palinga hel ana ure mur. Ol pe elle nge iri mene kakop ke teke hune non soke Kaepas nena none pe kakop mene hot mene talngana nenga tamalmal. Ol pe Iesus hele, "Apoi ke pomam ero!" Pe penna langa non neu talngana pe hemas mule."



8

Iok laol, te laua Iesus pe te mene i langa tunginga ana hana mur aria ae huna nena pele. Pe Petrus i ke nanas ia iri. Ol pe Petrus iteu langa pele neu koana nge hot.

Pe tetun hite oan ke remenmen nga kileng unne neu. Pe Petrus lake hanel oan luluch nge iri nenge te halelel neu.



9


Petrus hele ke mau pe tunginga ana hana mur aria soke nena none tu lamau pule. Non neu alona laka non nenge Petrus pasasal hote talngana. Ana non lohaka pe hele lange Petrus, "E naue iong pule nge otu luluch nge Iesus nga ae oliua ana ume nem." Pe Petrus channanga mule pule. Pe nga etue neu pengpeng pareo tang sapele. Ol pe Petrus ua hot sapele nga kileng unne neu pe tang ke teke mete.



10


Iok laol, Iri hana papalaungana nemur te lohaka pe te mene sapele Iesus lange Pilatus. Ol pe Pilatus ontei sapele Iesus. "Ae, Iuta mur aria naungaala ana non ma iong mam?" Pe Iesus hele, "Iong sipom o hele hote helenga nem." Pilatus hele hot mule letena lange hehei pe hana

nga nenge teke hune Iesus ero. Pe ero. Hulua nemur alngaria haka mule ke pomai, "A heon heke! A heon heke!"



11

Pomalam ne Pilatus tunge Iesus lange iri ke te heon heke nga manga toto. Ol pe Palinga hel ana hana mur te mene Iesus kela. Pe Iesus i sipona takisia ana manga toto kela nga Kittol ana kileng (nenge iri Hipru te hetue ke Kolkota.)




12

Nga lamau te heon heke i nga manga toto pe te heone hana nai pule nga Iesus ilina ele pe ele. Elle heon nga pen tamalmal pe e nga pen hoihoi pe Iesus nga tunangana.



13

Pe huunga ala palaungana nenge heon teu nga NeHalang na pele letena, chach nga lut kela het nge sio ke sachana nai. Ol pe Iesus alangana hot ke palaungana toto ke pomai, "Temek, e tung mene iau lange iong ol." Iesus hele ke pomai pe mete sapele.



14

Nga ulei Iosep nenge Arimatea lohot. Iosep i non soke e nge Israel pe i non urana ngana nga hehei pe hana tenau ngaria. I pule kulelele etue nenge hehei pe hana tenau haka lange NeHalang ke aria soke ia.

Iok, Sapat ana etue lohot ke pomange rou, pe heueu i etue nenge te tatalo ele ure mur lochloch nike.

15

Pomalam atong Iosep matau ero toto pe langa ne Pilatus matana pe onteia i nga Iesus koluna. Pomalam Iosep olia ruchinga hit hussu ngana pe mene sue Iesus koluna ke sio at pe ruch hite pe teteuia langa polo letena.

Polo neu pomanga rika nenge hana te selia. Te hemara sue Iesus koluna ke het pe Iosep hesasa hulua um kela ma totele polo hanna.

16

Iok, Israel mur aria etue nenge te hetalaulaia lape lohot ke pomange rou. Pe hana nenge te popoi tunginga aria papalauna mur pe Paresio mur, tela ke te esia ne Pilatus.

Tela pe te hele, "Non soke, letemem metene non nenge channanga hali nem nena helenga e nge tamal hote. Nga etue nenge tu ke maulul kura helele ke teke, 'Etue mol het pe lape e mau haka mule.'"

17

18

Iok laol, hana nemur tela pe te hepile heke ute nga um nenge ma hele polo neu, pe te hemes sue palinga hel ana hana mur ke te mes pe tenau ala sapele.

Iok, Sapat ana etue het lo pe miliko sio sapele. Pe nga uachuach Maria Mantalena pe Maria e pule te teke tela ke tenau toto nga polo nenge Iesus koluna ma ia. Ol pe mangila palaungana rur pe Non Soke na angkelo e sio at nga tapa,

pe i langa polo nenge Iesus koluna ma ia.

19

20

I la pe hesasa hul kelkelia um nenge te poi e le nga polo hanna pe kila haka ia. Pe palinga hel ana hana nemur te esia angkelo neu pe te matau pe te loiloi toto. Pe ngaria lohot pe te unalou sio mene iri nga ich pe tema ke manga hana hel nge te mete.




21

Pe angkelo neu hele lange hehei nai neu ke teke, "Imo nai a matau ero. E eteia lo nge a teke anau toto Iesus nenge te heone nga manga toto. Pe ana non, i ero nga lamai lo. Imo a iat ke anau nga munna nenge maia.

Ngana

kou mau haka mule ke lalo ke pomanga hele ngana."



22

Hehei nai neu ueiuei mana pe te ua nga kileng unne neu. Pe te matau pe te iech pe te song kela te hele nge Iesus nena hana mur. Ol pe Iesus herura hot mene iri pe hele, "Uach toto nge imo nai." Ol pe iri nai tela nge Iesus ke te rahat nga apena pe te heto heke I.



23

Nga hoena Iesus nena hana mur nge iri analoch pe elle teare kirau ke te ngaungau pe Iesus lohot taua iri. Pe hele inin taua iri iange ramaria kerkereng pe leteria manmanna ero nge hehei pe hana nenge te teke te esia Iesus nge mau haka mule lo. Iesus hele lange iri ke het pe lohaka la sapele nga lut nga tapa pe are nga temene ilina hele nga pen tamalmal.

24

NeHalang lemene tau tote hehei pe hana nga ich nei. Pomalam tung hote tuna elle mana nem. Pe iri nenge leteria manmanna nge i lape te mene maulinga ke koko. Te mete sapele ero.

54

60

25

Rom 3:23
Iange ita lochloch ta poia poinga poreke ngana ke elle pe ta urana ero nge ta mene NeHalang nena hemalmalinga.

Rom 6:23
Iange poinga poreke ngana uruna laka metenga, pe NeHalang nena tunginga nenge tung mene at nge ita, ngana laka maulinga ke koko nge ara Non Soke Iesus Kristus.

Hipru 9:27
Pe ita hana pule ta mete ke elle mana pe la tames nga NeHalang matana ke annei teu atat nge ita elle pe elle nga rera poinga mur.

26

Epeses 2:8,9

Iange nga NeHalang nena poinga urana toto ngana, mene mule imo nenge letemo manmanna. Imo sipomo a mene mule imo ero. Poinga nem i tunginga nenge at nge NeHalang. Lemo ume urana ngana mur poi hote ure nem ero. Ke pomalam a palut leke imo ero.

Rom 10:9,10

Ke nenge teke o hele hot ke o teke, "Iesus i Non Soke," pe letem manmanna nga letem toto ke NeHalang hemaul heke mule i nga metenga, lape NeHalang mene mule iong. Iange letem manmanna nge teu toto pe nem poia iong ke o lohot ke o pengpeng nga NeHalang matana. Pe nga halim o hele hote letem manmanna ngana pe nem poia iong ke NeHalang mene mule iong.

27

Ioanes 3:16,17

"NeHalang lemene tau tote hehei pe hana nga ich nei. Pomalam tung hote tuna elle mana nem. Pe iri nenge leteria manmanna nge i lape te mene maulinga ke koko. Te mete sapele ero. Iange NeHalang kulos sue Tuna at nga ich ke heporeke hehei pe hana ero. At ke mene mule hehei pe hana ke tela nge NeHalang. Pe kue nenge tela ia nge NeHalang, ngana laka nge Iesus i sipona lo."

1 Ioanes 5:11-13

Pe ana helenga lohot ke pomai koi: NeHalang tunge maulinga ke koko at nge ita. Pe maulinga nem at nge Tuna. Ke mele nenge letena manmanna nge NeHalang Tuna mene maulinga nei ke ulolo. Pe mele nenge letena manmanna nge NeHalang Tuna ero mene maulinga nei ero toto. E hasia ure nemur lange imo nenge letemo manmanna nge NeHalang Tuna. Ke pomalam lape a eteia ke nek toto nge a mene maulinga ke koko ke ulolo.

28

Mateus 26-28; Lukas 22-24; Ioanes 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Lote NT (uvi) © 2009, Wycliffe Bible Translators, Inc.
All rights reserved.

<https://live.bible.is/bible/UVLWBT/MAT/1>

©2026 Bible for Children, Inc.
www.M1914.org www.bibleforchildren.org

29